



Tir Yimyim

www.tiryimim.in

Regd. No. RNI. NAGAAO/2004/13113. Postal-NE/RN-717.

e-mail : tiryimim@gmail.com

TAPAK 7

Yangia anidakangma :

f Tir Yimyim

Instagram tiryimim@aolima

YouTube tir yimyim

TAPAK 10

BJP candidate Priyanka Tibrewal-i
Mamata den tokteptsü

T20 WC: Afghanistan team atema
Mohammad Nabi captain shimogo



VOL. XVIII NO. 329 (ADOK 329) DIMAPUR

KÜPTOKNÜ (SATURDAY)

RONGJUI (SEPTEMBER) 11, 2021

₹ 5.00

COVID-19 Nagaland: Nisung 45 dak putet, 48 taneptsü angu

Kohima, September 10, 2021 (TYO): Hokolbarnü Nagaland nung nisung 45 dak COVID-19 putet aser 48 taneptsü angu.

"Tesüiba ghonda 24 tsüingda nisung 45 dak COVID-19 aliba putetogo. Parnokji Dimapur nung 27, Kohima nung 12, Mokokchung nung 2 aser Kiphire, Tuensang, Wokha o Zunheboto nung kaka (1) lir," ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang COVID-19 puteta alir nisung 48 taneptsü angu. Parnokji Mokokchung nung 13, Kohima nung 12, Dimapur nung 11, Zunheboto nung 6, Phek nung 4 aser Longleng o Mon nung kaka (1) lir" ta paisa ashi.

"Tang tashi nung nisung 30,510 dak COVID-19 putetogo aser iba nungi nisung 28,344 taneptsü nguogo. Tang nisung 650 anepaludar" ta Dr Kikon-isa ashi.

Nagaland nung COVID-19 alitsü akok ta temolung melemi bilemba sample 342,753 tendangogo. RT-PCR ajanga 106,833, TrueNat ajanga 79,032 aser Rapid Antigen Test ajanga 156,888 tendang, ta Dr Kikon-isa metetdaksü.

Brihostibar tashi nung Nagaland nung nisung 667,556 nem COVID-19 vaccine indang dose 913,829 agütsüogo, ta State Immunization Officer, Dr Ritu Thurr-ia ashi.

Vaccine agirtemji frontline workers 60,859, healthcare workers 15,993, arishi küm 45 ser temapur 194,604 aser arishi küm 18 nungi 44 tsüingda alir 396,100 lir, ta paisa ashi.

"Vaccine agirtem rongnung nisung 246,273-i dose anaprong agiogo. Parnokji frontline workers 45,151, healthcare workers 13,033, arishi küm 45 ser temapur 119,934 aser arishi küm 18 nungi 44 tsüingda alir 68,155 lir" ta Dr Thurr-isa metetdaksü.

Naga yimten latettsü atema party ajak adenba sorkar nungdaker

Kohima, September 10, 2021 (TYO): Naga yimten latettsü atema Nagaland nung party ajak adenba sorkar ka nungdaker, ta Hokolbarnü Nationalist Democratic Progressive Party (NDPP) Working President, Alemtemshi Jamir-i ashi.

Chief Minister Neiphiu Rio-i NDPP lennir ajak dang iba osang metetdaksüogo aser onokia yimten latettsü atema nungdak ta jembitepogo, ta pai ashi.

"Naga yimten latettsü atema dang onoki NPF-i opposition maliba sorkar akümtsü shidangba molunga agizük. Onoki tekaratiba nung yimten latettsüünür. Opposition maliba sorkari mapa takok ngua inyaka ora onoki Naga yimten teloktem danga külemi longjemtsü asüingdangtsü. Public-i rongshiba ajanga parnok longjemtsü" ta Alemtemshi-isa ashi.

BJP-i nunngnangba ajanga Nagaland nung opposition maliba sorkar ano mekümte aruogo saka tawa Chief Minister-i Delhi nung oa BJP

lennirtem den onüktem angatettepogo, ta paisa shisem.

Nagaland nung NPF dena opposition maliba sorkar ka aküm nungbo People's Democratic Alliance (PDA) mali akümtsü ta BJP national lennirtemi shisabulua liasü saka NPF aden nunga PDA alitsü, ta Alemtemshi-isa metetdaksü.

Nagaland Governor R N Ravi Tamil Nadu nung inyaksü belenba atema osangbeneri asüingdang "Onoki (NDPP) iba atema kecha mejembi" ta pai langzü.

"Ajisüaka interlocutor ka nem Governor mapa inyakdaksübjaji tim masü" ta paisa ashi.

"Tang mapa ana bendangogo anungji olemtep maparen tenzüksü akok. Bendang linük nung Prime Minister jenjang nung olemtepba nungi State ka indang Governor jenjangi bener aluba ajanga olemtepertemi tipmatem tensa ajurur asütsü akok" ta Alemtemshi-isa metetdaksü.

Foothill road atema sorkari sen crore 30 lemzüksüogo

Dimapur, September 10, 2021 (TYO): Nagaland sorkari Foothill road atema sen crore 20 lemzüksüogo aser iba jagi Doyang apu renemtsü aser March 2022 tashi nung gari tilabo senzütetsüsa lenmang yanglur alitsü akok.

September 10, 2021 nü Chief Minister-i Deputy Chief Minister aser Department ketdangsürtem den iba tebilemstü lemsateptsü atema senden ka ayonga amen aser idangji Department dang gari senzütetsüsa lenmang yanglutsü tetuyuba agütsü.

"Iba nungji ajemdaker taküm Financial year tsüingda emergency mapatem inyaksü atema Rs. 20.00 Crores aser Governor's Camp nung Doyang apu yanglutsü atema Rs. 10.00 Crores indang Administrative Approval renemogo. Iba atema Department-i tender mapa inyaksü atema tetuyuba agütsüogo" ta Hokolbarnü Department of Works & Housing-i sangdong ka nung metetdaksü.

Nagaland tenemtsünglen gari lenmang ka alitsübjaji kanga

tongtipang aser iba ya nisung ajaki meteta lir. Iba ama lenmang ka ajanga senzüsenbongba nung dang masü saka lokti aser rongsenketzung nung temelenshi bentsür arutsü, ta parnokisa ashi.

Iba jagi state sorkari Mon, Longleng, Mokokchung, Wokha, Dimapur aser Peren district tem nung kilometer 300 den talangba gari lenmang ka yanglutsü tebilemba agizük mapa tenzük. Ajisüaka, state sorkar ket nung senotsü peria maliba ajanga telok balala nungi teyari agia mapa inyak.

Nagaland nung tenemtsünglen gari lenmang ano merenemtet lir saka state sorkari iba ya asangsang nung yanglutsü atema tenangzükba agiogo aser iba jagi Nagaland Vision 2030 nung densema lir, ta Department of Works & Housing-isa metetdaksüogo.

2013-14 nung sorkari Special Plan Assistance (SPA) ajanga kilometer 342 talang lenmang yanglutsü atema Rs 235.00 crores lemzüksü. 2013-14 nung Rs. 4000.00 lakhs aser 2014-15 nung Rs. 6700.00 lakhs (Rs.

67.00 Cr) lemzükja mapa inyak. Ajisüaka 2015-16 nungi India sorkari SPA sen agütsüba anen aser iba jagi lenmang yanglutsü sentong alibatem meinyaktet, ta parnokisa ashi.

State sorkari iba lenmang yanglutsü atema India sorkar dang SPA kübok senotsü teyari agütsütsü atema jembia arur. 2014-15 nung state sorkari Ministry of Road Transport & Highways (MoRTH) dang Foothill road ya National Highway ka ta jaloktsütsü atema tebilemba shidangogo saka tanü tashi ibaji mesangdong lir, ta Department-isa ashi.

January 19, 2021 nü Nagaland Chief Minister-i Union Minister, Road Transport and Highways dang BharatmalaPariyojna project kübok iba lenmang yanglutsü atema ashi. Maneni, September 6, 2021 nunga Chief Minister-i Prime Minister dena iba tebilemstü lemsatepogo aser item ajanga sorkari iba mapatong tembanga inyaksü merangba kulitem sayur, ta parnokisa metetdaksü.

Nagaland nung tetsür Entrepreneurs ajungkettsü atema MoU sign süogo

Kohima, September 10, 2021 (TYO): Hokolbarnü the Investment & Development Authority of Nagaland (IDAN) aser Project Her & Now (GIZ), Dhriiti - The Courage Within tsüingda MoU ka nung sign süogo.

IDAN indang office nung online ajanga MoU nung sign sütep aser Nagaland sorkar tenüing nung IDAN Chief Executive Officer (CEO) Alemtemshi Jamir-i sign asü. Külen, Deutsche Gesellschaft für Internationale Zusammenarbeit (GIZ) GmbH, Head of Project Her & Now, GIZ Julia Karst, Dhriiti - The Courage Within Co-founder Anirban Gupta aser GIZ Head of Project, Ullas Marar nungertem sentong nung aden.

Her & Now nungja nung iba mapatong yagi India nung tetsürtemi shishilembaba mapa inyaksü lenmang lapoktsütsü alizüing lir.

Memorandum of Understanding (MoU) ajanga telok aseme külemi Nagaland nung tetsür entrepreneurship

atema yariteptsü. IDAN ya Nagaland sorkar indang investment promotion and facilitation agency ka lir. Iba ya June 2018 nung Cabinet telemtetba ka ajanga tentetba lir.

GIZ and Dhriiti-The Courage Within telok ana ya Project Her & Now ajanga külemi mapa inyaka arudar. Parnoki North East Region nung tetsür entrepreneurs yarir, ta Her & Now Head of Project, GIZ Julia Karst-i ashi.

"Onoki IDAN aser Dhriiti den tesentaktep yangluba ajanga Nagaland nung onok alizüing atongtsü imlar" ta Karst-isa ashi.

"Her & Now, GIZ aser IDAN tsüingda tesentaktep ajanga Nagaland nung tetsür entrepreneur temi pei maitsü balaka yanglutsü imlar. Iba ya Nagaland nung tetsür entrepreneurs yaritsü atema lir" ta Dhriiti co-founder Anirban Gupta-ia ashi.

GIZ GmbH-i German Federal Ministry for Economic Cooperation and Development

(BMZ) tenüing nung aser Ministry of Skill Development and Entrepreneurship (MSDE) den yaritepa 'Economic Empowerment of Women Entrepreneurs and Start-ups by Women' mapatong inyaker.

"Nagaland nung tetsürtem tashi itta lir saka tetsür entrepreneur aser mapa inyakba nung tetsükdaksü kar lir. Iba mapatong ajanga Naga tsürtem entrepreneur akümtsüba nung yariteptsü" ta Alemtemshi Jamir-ia ashi.

"IDAN-i tetsürtem yaritsü asoshi GIZ aser Dhriiti den tesentaktep yangluba atema pelar. Iba mapatong indang mapang tembangba sülen-a onoki tetsürtem yaritsü imlar aser iba asoshi Nagaland sorkari teyari nungdaksü" ta paisa metetdaksü.

Entrepreneurship ya Industries Department indang mapa ka lir anungji lia aodang parnok department nem iba mapatong agütsütsü, ta Alemtemshi-isa ashi.

Indo-Naga Peace Talk Interlocutor melenogo

Dimapur, September 10, 2021 (TYO): Indo Naga peace Talk atema interlocutor R.N Ravi melena tangar ka shimogo. Additional/Special Director of Intelligent Bureau (IB) A K Mishra-i pa melenzüksü.

A K Mishra ya Rajasthan cadre

nungi 1987 batch IPS officer ka lir. NSCN-IM-i pa den aiben ajurutepa jembishinü süogo ta osang angazüker.

RN Ravi ya Kerala nungi 1976-batch IPS officer ka lir. Pai Ajit Doval den tesentaktep tajung lia külemi inyakogo aser 2012

küm Intelligence Bureau Special Director inyaka lia mapa nungi sodi angu.

Brihostibarnü President Ram Nath Kovind-i R.N Ravi Tamil Nadu nung Governor inyaksü shim. Pai Banwarilal Purohit melenzüksü.

AHoDs aser HoDs senden takok ngua menogo

Dimapur, Rongjui/Sept. 10 (TYO): AHoDs aser HoDs senden ka Secretariat Conference Hall, Kohima nung September 10, 2021 nü Nagaland Chief Secretary J. Alam, IAS mendenpuba sür mena liasü.

Iba senden nung Chief Secretary ajanga department ajunga dang osangkaket tem nem advertisement bill magütsüi aliba tekeratiba nung agütsüsü ajungshia liasü.

Pai websites amshitsü tongtipang ta iba senden nung nenshia ashi aser department ajunga dang pei department website teti update süa alitsü ashi, kechiyong nüburtem nem department indang osang agütsüsü sources ji ibai kisüing lir.

Mapang shidak nung aser shidak update asüba ajanga RTI

case tem ajema akumtsü, ta pai ashi.

Principal Secretary IT & Power, K. D. Vizo-i iba senden nung ashiba agi, department 95 nungi department 72 nung dang website update süa lir aser tanüingba department 23 nung ano update masü.

Sorkar meyong departmental website ajunga ya State Data Centre nung bendentsü, ta 2016 küm Cabinet telemtetba lir, ta pai ashi.

Principal Secretary Home, Abhijit Sinha, IAS ajanga department ajunga dang India nunger nüjiso ngur küm 75 anungba Azadi Ka Amrit Mahotsav nungtem nung sentong balala ayongzüka agia iba osang Home Department nem agütsüsü ashi.

Chief Secretary ajanga AHoDs aser HoDs tem dang

maneni officer aser staff tem indang attendance mita reprangtsü ashi aser kati ka den tesendaktep tajung nung inyaksü ajungshia liasü.

Iba senden nung Legal Consultants/Advisers/Assistants shimba anenba dak sendakba nung "Engagement of Legal Consultants" indang osang ka Department of Law & Justice ajanga metetdakja liasü.

Finance Department ajanga August 24, 2018 aser April 15, 2019 nung sangdongba densema Legal Assistant, Legal Advisers, Legal Consultants dak sendakba sangdong ajunga awajemer.

Iba senden nung CAG Audit report indang PowerPoint presentation ka Finance Department ajanga agüja liasü.

NIPUN BHARAT Mission senden Kohima nung kaogo

Dimapur, Rongjui/Sept. 10 (TYO): District Steering Committee on "National Initiative for Proficiency in Reading with Understanding & Numeracy (NIPUN) Bharat" pur den shisadokden senden ka Deputy Commissioner, Kohima indang Conference Hall nung September 10, 2021 nü mena liasü.

Iba senden nung ADC Kohima, N. Bhavani Sri ya menden liasü aser NIPUN sentong angateta sayatsü nükjidong nung iba senden ya amener, ta metetdaksü.

Lai, district-i shilem tulu agitsü lir aser iba sentong nung takok angutsü mechi sendaktepa aliba department ajungai lungjemer inyaksüla, ta ashi.

NIPUN Bharat indang tongmelang agi rateta ashiba mapang, linük nung 2026-27 tashinung Grade 3 tatem tashinung tanur ajunga

Foundational Literacy and Numeracy (FLN) ajandaktsüsü mechi Ministry of Education ajanga NIPUN ya semzük, ta Deputy Mission Director, Samagra Shiksha, Kelhikha Kenye-i ashi.

Foundational Numeracy tetetzü anogoshi timtem ajuruba koktetba nung kuli bushitetba tashi aser numerical concepts tongmelang amshibatem lir, ta pai ashi.

Iba mission ya centrally sponsored scheme, Samagra Shiksha kübok amenoktsü, koba School Education indang integrated scheme ka lir aser iba scheme yagi pre-school nungi senior secondary level tashi ayimjemer.

Iba scheme yagi tanur arishi küm 3 nungi 9 tashinung pre-school nungi Grade 3 tashi dak rangloksü.

Iba sentong kera tenzüka asoshi Kohima district nem tenüngsang agütsüba mapang,

Kenye-i sendaktepa aliba department ajunga dang level ajunga nung tesayur, tsürabur, community leader aser lokti tentet balala anisemer school tanurtem iba sentong nung shilem agidaktsüsü ayongzüka liasü.

Iba senden nung Kenye-isa FLM Mission indang nükla, National Achievements Survey (NAS) 2017, National Education Policy 2020, 2026-27 tashinung FLN takok angutsü nükjidong, iba mission indang learning goals, empowering teachers, administrative approaches, state aser district sasep nung amenoka aliba PMU, monitoring & information technology/framework aser FLN mission ajanga tanur dak kongshiba indang PowerPoint presentation agüja liasü.

Iba senden nung Asstt. District Co-ordinator DMA, SS Kohima, Thongsleno ajanga tarur pela agizükba o jembia liasü.



National Tobacco Control Programme (NTCP) kübok District Tobacco Control Cell, Mokokchung ajanga PS-1 Mokokchung nungi sepaitem den külemi September 10, 2021 nü moko ayokba nokdangba maparen balala inyaka jaja liasü. Iba mapang moko agi yangluba osettem kaket reju anasa ayokba apu aser COTPA Act, 2003 indang Section 6 (b) nung aliba ama merenshia liasü.

Chief Minister ajanga committee balala senden ayonger

Dimapur, Rongjui/Sept. 10 (TYO): Commissioner & Secretary, NLA, Dr. P.J. Antony ajanga sangdong ka nung ashiba agi, Assembly's Select Committee to Examine the Nagaland-Assam Border Issue

Kohima nung New India@75 maparen maneni inyak

Dimapur, Rongjui/Sept. 10 (TYO): Kohima district kübok shimteta aliba School aser College tem nung HIV & AIDS, TB aser Blood Donation indang awareness drive phase mezüingbuba agiba sülen September 10, 2021 nüa District Level for implementation of New India@75 activities ajanga Christ King Hr. Sec. School aser Holy Family Hr. Sec. School, Kohima nungi kaketshirtem asoshi awareness sentong ayongzüka liasü.

Kasa awareness sentong ya virtual mode nung GHS Chandmari, Kohima nung azünger asoshia kasa anogo ayongzüka liasü.

Mokokchung district nung polling station indang draft list renema lir

Dimapur, Rongjui/Sept. 10 (TYO): Additional Deputy Commissioner & Electoral Registration Officer, Mokokchung, Shashank Pratap Singh, IAS ajanga sangdong ka nung, 21-Tuli Assembly Constituency, 22-Arkakong, 23-Impur, 24-Angetyongpang, 25-Mongoya, 26-Aonglenden, 27-Mokokchung Town, 28-Koridang, 29-Jangpetkong and 30-Alongtaki Assembly Constituency atema polling stations indang draft list

RD Department ajanga Orientation Training agütsü

Dimapur, Rongjui/Sept. 10 (TYO): Calendar of Activities of the People's Plan Campaign nung aliba ama September 10, 2021 nü RD Conference Hall nung Gram Panchayat Development Plan 2021 indang Orientation Training ka Line Department Nodal Officers asoshi agüja liasü.

Iba sentong nung Joint Director RD aser State Nodal Officer, K. Neibou Sekhose ya menden liasü aser pai taoba küm inyaksangshiba indang osang lemsatepba den taküm taliba inyaksü nungdak, ta shia liasü.

PowerPoint presentation ka nung pai yimtsüing shia Gram Panchayat Development Plan ajanga tajangzüik anguba indang lemsatep aser Line Department dang parnok indang project/scheme tem yimtsüing putu menden nem metetdaksüsü ajungshia, aji asüing dang yimtsüing terenlok sentong nung itemji dendaktsüsü.

committee ana indang senden September 14, 2021 anepdang 10:00 ako aser 11:30 ako nung Nagaland Legislative Assembly Secretariat, Kohima nung aliba Committee Room nung jatepa lir.

Selected Committees indang züingsem ajunga iba senden nung arua adentsü metetdaksür, ta sangdong ajanga ashi.

Iba sentong ya National AIDS Control Organisation, Ministry of H&FW, GoI tawabangba kübok ayongzüka liasü.

Iba sentong nung DIS DAPCU, Dr. Vituozolie Kuotsu; DTO Kohima, Dr. Akaba; Dy. Director (SPM) NSACS, President Voluntary Blood Donor's Association Kohima, Ainato Yeptho; Coordinator Kripa Foundation & Executive Chairman VBDA, Bendang Imsong aser Asstt. Director (VBD) NSACS & Executive Member, VBDA, Kohima, Alipoker nungtem shisalen sayur ama shilem agia liasü.

adokogo, ta metetdaksü.

Item draft list ya nüburtemi reprangtsü atema office mapang Office of the Deputy Commissioner & District Election Officer (DC & DEO), Mokokchung nung angutsü.

Polling station indang draft list nung metongshitsü aser aibelen kar danga lira, itemji DC & DEO, Mokokchung nem September 15, 2021 tashinung agütsüsüla. Iba sülen aruba temelenshi mesüra ashishitep kecha magizüksü, ta sangdong ajanga ashi.


Inyaksangshia ajunga ya Gram Samvad App nung upload asütsüla, anungji züingsem ajaki amalitep akatsü amanger, ta pai sentong nung adenertem ayongzüka liasü.

Iba campaign takok ngua katettsü asoshi District level Nodal Officers, facilitators aser frontline nung inyakerem shimtetsüla, kong frontline nung inyakeremi tongtipang shilem agitsü, ta Sekhose-i ashi.

Taoba küm State ajanga Panchayat Award balala anguba indang lemsatepba mapang pai sentong nung adener dang tali meranga inyaka sempet tali angutsü ayongzüka liasü.

Iba training nung Environment, Forests & CC, NRE, School Education, Water Resources, Fisheries & AR, E&C, PHED, A.H. & Veterinary, Agriculture, Employment, Art & Culture aser Social Welfare Department tem nungi Nodal Officer tem dena liasü.

Meghalaya nung 'Whistling village' nem 'Best Tourism Village' sempet agütsü



Guwahati, September 10, 2021 (Agencies): Centre-i Meghalaya kübok Kongthong village nem "Best Tourism Villages" sempet agütsüogo. Linük nung yim ana den külemi Kongthong nem sempetji agütsü. Iba yim dang 'Whistling village' ta ajar aser Ministry of Tourism-i World Tourism Organization atema tenüing agütsü.

Iba sempet anguba atema Union Finance Minister Nirmala Sitharaman-i Meghalaya Chief Minister Conrad Sangma nem tenüingsang agütsüogo. Kongthong nungeri nisungtem nem tenüing melena kensü-ola agi ajar, ta Sitharaman-i ashi. Iba yim nung tetsü kati lar tanur dang tenüing melena 'tune' agi ajar. Kongthong nung alirtem

tenüing ana lir, ka tangari ajaba ama tenüing aser ka kensü-ola lir. Kensü-olaji tapu ana- ka ken tatsü aser ka talang lir. Ken tatsübaji kidang amshir aser talangbaji arem nung temenen tanüla aridoktsü atema ajar. Iba yim nung kensü-ola agi ajaba tenüing dang 'jingrwai lawbei' ta ajar. Kongthong yim nung nütsüing yongsük 700 shi lir aser Class 8 tashi school ka lir.

Majuli rong lendong: Nisung ana samar bushir

Jorhat, September 10, 2021 (Agencies): Bodbarnü Majuli nung rong lendong atalokba sülen NDRF aser SDRF-i maneni nisung ana samaba bushitepdar. Tenaji Vikramjeet aser Jaan Baruah na ta jangjaogo. Iba lendong nung rong nung mena alir nisung 87 tashi kümzükogo aser ana mangu bushitepdar, ta Assam sorkari ashi. Lendong nungi kümzüküer arishi küm 28 tain tetsür Parimita Das Jorhat Medical College and Hospital (JMCH) nung asü. Parimita ya Majuli nung College ka nung associate professor inyaka liasü. Rong nung amener nem

ticket magütsü asünung administration-i nisung kwi mena liasü'ar osang tejangja memetet. Majuli Kamalabari-i aotsüba rong 'Ma Kamala' aser Majuli asetkong nungi sorkar meyong 'Tripkai' rong tsüktepdang iba lendong atalok. Assam sorkari state nung nija rongtem mesenzütsü tenokdangba agütsüogo. "Tanü nungi nija rongtem senzüba anentsür kechiyong parnok marine engine mali" ta Assam CM Himanta Biswa Sarma-i ashi. Ajsüaka, CM Sarma-isa nija rong kiburtem dang marine engine enoktsü lenmang ka lapoktsüogo.

"Kiburtemi rong nung marine engine enoknüra, sorkari Rs 10 lakh den 75% subsidy agütsütsü" ta Sarma-i metetdaksü. Hokolbarnü Cabinet senden amendang Additional chief secretary Maninder Singh-i ita ka tsüingda Majuli nung rong lendong atalokba bushisüingdang osang agütsütsü tetuyuba agütsü. Kasa mapang, Jorhat police-ia iba lendong ataloktsüsa mapa shitak meinyakertem anema FIR benoktsü tetuyuba agütsüogo. Maneni, Cabinet-isa Finance Minister Ajanta Neog-i Jorhat-Majuli apu yangluba ketdangsüa reprangtsü telemtetba agiogo.



World Suicide Prevention Day nung Assam kübok Tezpur nung nurse temi sentong ka nung shilem agiba angur. (Tezpur, September 10)

Meghalaya Governor-i arrtsü atema regional committee 3 tentet

Shillong, September 10, 2021 (Agencies): Meghalaya-i Assam den arrtsülen mangatetep aliba tesem 6 nung osang metetpelatsü atema Meghalaya Governor Satya Pal Malik-i regional committee 3 tentetogo. Meghalaya nung Cabinet minister kati regional committee asem ketdangsüa reprangtsü ta osang ashi. Meghalaya Governor-i committee züingsemtem dang Assam nung arrtsü atema tentetba committee tem den olemteptsü tetuyuba agütsü.

atema state transport minister Sniawbhalang Dhar nati committee len anitsü. West Khasi Hills, East Jaintia Hills aser Ri-Bhoi nung deputy commissioner temi committee shia nem teyari agütsütsü tetuyuba agütsü. Regional committee temi iba tesem nung alirtem aser Autonomous District Council züingsemtem den ajuruteptsü aser kuli nung ajemdaker yim arrtsü ladangtsü, ta sangdong nungsa shia lir. August 6, 2021 nü Guwahati nung chief ministerial-level nung senden amendang arrtsü mangatetep onüktem atema regional committees tentettsü telemtetba agia liasü. "Meghalaya aser Assam nungi mangatetep aliba tesem 6 dak sendakba onüktem reprangtsü atema state anaprong nung Cabinet Minister menden ser Regional Committee 3 tentettsü telemtetba agiogo" ta August 6, 2021 Meghalaya chief minister Conrad Sangma-i metetdaksa liasü. "Onoki kati ka akhümtsüba aser North East ka ta asüba tangatetba nung longjemmer arrtsü onüktem angateteptsü lemetetogo. Assam M Himanta Biswa dang kanga pelar" ta Conrad-isa ashi.

Iba mapang parnok tsüingda state ana nung alirtemi kuli agütsübatem jangjateptsü. Assam-Meghalaya arrtsülen mangatetep aliba tesem 6 ji-West Khasi Hills district nung Tarabari, Gizang aser Hahim, East Jaintia Hills nung Ratacherra aser in Ri-Rhoi district nung Boklapara aser Khanapara-Philangkata lir. Ri-Bhoi district atema Chief minister Prestone Tynsong-i committee ketdangsütsü aser iba nung local MLA asem adentsü, ta Meghalaya chief secretary MS Rao-i sangdong ka nung ashi. Maneni, West Khasi Hills district atema public health engineering minister R Tongkhar aser East Jaintia Hills



Tripura nung CPI (M) züingsemtem aser party office amakba atema tejashi sayua Guwahati nung CPI (M) züingsemtemi lungkak aitba noksa njung angur. (Guwahati, September 10)

Manipur nung Kuki telungpur telok C-in-C khaset

Imphal, September 10, 2021 (Agencies): Hokolbarnep 1:00 ako meta Manipur nung Socialist Democratic Front of Kukiland nung commander-in-chief Letingthang Haokip khasetogo. Osang tejangja ka angazükba nung ajemdaker 46 Assam Rifles sepaitem aser Churachandpur district police telok kati ayaterm nung tesem ka mita ao. Parnok Khominthing yim

anasa aosang idakji jenoka aliba telungpurtemi injang khaloktsü, ta police-i ashi. Parnok khatetpa sülen Lungkhosei indang mang angu aser pa J. N. Institute of Medical Sciences nung anepalutsü atema anir ao. Sepaitemi iba temeket nung telungpurtem maneni bushidar. Sorkari Suspension of Operations (SoO) sign asüba nung Socialist Democratic Front of Kukiland maden, ta police-isa metetdaksü.



TIR YIMYIM

YIMOBILEM (EDITORIAL)

DIMAPUR KÜPTOKNÜ RONGJUI (SEPTEMBER) 11, 2021

Ya ni tai!

Onok tanur asüdangbo, tang ama mei mapang kodangsa anüngdang mesüra nikongtsütsü alu nungtertem alu nungi madoktet lenmang nung yipru aser tzümetsüng agi timtem tulu ajurua alitsü südi ta shisabolua bilem aser tzünglu aneper lenjiisa ao. Tanü tensa den kodang iba mapangji medemdangdir, tanübo alima tasen nung alir amai kenyongi balaka melenshiadokogo. Aji oda, joko tzünglu aser yipru tulu aruagi talidak ki ajak metsübangba osang angashidang aser gari lenmanga mangu lenmang agi ayong kümer motzü ayimdang aser yimti yimdong nung dena tesenzü majung motzü agi atsüngbanger lia ajurudang, ojala aser obala nungertem indang bilemer masü saka town aser yimtsüng balala nung alirtem meyong ki atsüngbanger aser yipru agi kilem ponger aoba indang temulung shia bilemer, aser itemji bilemdangdang, motzü agi atsüngbangertem aser kilem ponger oadokertem kibongtemji parnok aibelen agi kangshir masü saka ni' parnok junga anepalu masüba agi aser parnok meyong tangutsü tim ni' parnok nem magütsü ni' agiadokba agi, parnokji kangshir, anungji ni tai, ni ajanga parnok kangshir ta ni' kūsasa kü mulung tipmedemi bilemer. Ni yimsüsür ka, ni nübertem asoshi ketdangser (officer) ka saka nübertem jenjang ajungkettsütsü atema bilema masü saka kūsasa ozü kija akatsü aser ajungkettsü atema bilema inyakba agi, tanübo nia dena ozü yimti yimdong nung motzü agi mesenzütetsüsa timtem ajurur. Atangji, ozü ki aser kimabo matsüngbang aser kilema ponger mao, saka kidangi motzü aitba agi ozü nübertem aika aonung piyong nokdaker süidaktsüba osang angashidang, kü mulungjang animesüngzüktetter, kechiyong ni' parnok lenmang aser kilentzü shitak yanglutsü asübo yamaji matalokla ta ni meteta lir. Aji oda, ni' ozü ki tuluba aser talangba yanglunü dang ozü yimtak, ozü town aser ozü kiyong nung akhidang nungi teti motzü yimzüka aoba lenmang ajak nembanger ki meyonglu asübo, tanü ozü lima nung kibong paikaya tzünglu tera aru majung tzümetsüng agi ki ajak atsüngbanger kimai alua majung tim medemdaktsüla ta bilemer. Aji oda, nübertem asoshi lenmang aser kiojen yanglutsüba sen shitak amshia ni' parnok yari asübo, tang ya parnok yamai timmedemla ta ni' kü mulung rongga aiter. Tang tzümetsüng agi ki ajak atsüngbanga alirtem, yipru agi kilem ajak ponger orr timtema alirtem, lenmang majungba agi tounüeni mao aser teinyaknüsü meinyaktet timtema alirtem ajakji kü tai agi kangshirtem lir, kechiyong item mapa inyakttsüba sen ajakji ni' ozü kibong nungdang nung agiadokogo. Aji oda, tangang ni kü taküm indang jungjunga bilemdangdang, iba lima khen lir aotsüba lima nung tangar nungdakba purtem meyong agi ni takar amato küma jangratema alibaji, shitakba nung takar masü saka nisa tesensakba ta bilemer, kechiyong memenui item ajakji ni' toktsür aotsü aser item ajakji tangar meyong kümadoktsü. Yamaji ozü medemertem aika dak atalokba ni' nguogo. Ni kanga tamashi ta ni' bilemer. Tangbo ni' nübertem meyong senotsü agitsüba to ajak meyipa agütsünüa bilemer, saka tamakoktsü. Tamalen kü taküm aser temang junga alidang temoatsüa ta bilema kidangi bener aruba rongsentem to agi tangbo tashidak kümogo, iba jagi ni kangshir. Ni' Tsüngrem nungi taidok anguyonga kü shi temang timtemba tashidak yabo maneptsü südi ta ni' bilemer. Tangbo kü tai ajanga tangar dang masü nia dena kangshir aser ozü chirnurtema jangratema malir. Joko, ni ajanga tangar anisüngzükdaktsütsü aser peladaktsütsü ashi, ni' agitsüba aser ni' chitsüba agi alima nung nisung ka danga timmatemtsüla ta ni' angatetogo. Ajak ya ni tai, anungji ni dang melenshi nung ozü lima melenshitsü aser nübertem ajak melenshir alitsü ta tanü yimsüsür, ketdangser aser lenir ajaki bilema kechisarina ajak nung shitak, shitak inyak tenzük nungbo, Naga lima nung nisungi yangluba tzümetsüng, mapa manguba aser tebok masüngba tebilemstsü aser timtem malitsü. Asenokbo tang ajuruba timtem ajak ajak ya ni tai, kü tai ajanga ta ser Nagaland yanglushi tenzükdi.

OLEMSABANG

Tanü Mobile Addiction Lokti nung Tebilemstsü

Jungshimanen (Osang zülur)

(Yashi adok nungi...)

Sorkar Teinyaktsü

Mobile addiction nungi pei nübur kümzüka ayutsü asoshi sorkar teinyaktsü tulu lir. Online classes ya mapang tatsütiba nung agitsüla. Mapang talangka kodang online classes/exams agidir, ibai ajanga tanurtem aika phone amshiba yimya süba akümer. Okila nung ashiba ama, school lesson nungto - 'nung' ta mashi tsüngda, junga shisadanger iba melenji kechi asüba tajungba asütsü aji 'alternative' ka renemer atatsüla. Yamaji asenok rongnung aliba lokti temenen (necessary evil) ka den raratsü kanga tasak aser iba atema tashiyim (coercion) agi masü, ibaji melena tanga mapa (substitution methods) teinyaktsü shisadanger kanga ajungtsü.

Shisashiba yayim (Education system) ya tashir/takari zülua yutsüba azüngba (theory) nungi tanü mapa balala inyaktetba (skills development) dangi meyiptsü mapang tongogo. Azüng-zülu metetra aser iba den teinyaktetba balala nung tumulung agütsüra, Mobile Addiction nungi dang anenbaji masü, saka asen lima tangar menüpa takar akümstsü.

Loktiliba Teinyaktsü

Nungdak maka nung phone amshiba nungi pilatsü atema, anogo shia anepdang nungi aonung tashi teka mapa ka mesüra kabosa inyakttsü sentong yanglutsüla. Atangji, mapa maka kazüba temenen adenshia mapa inyakttsü mulungjang ta Apijemtsü Shin kakat nung angur. Mapa-iba ya inyakttsü ta mesayu aser magütsü saka mobile-a tamshi ta ozüng agi tashiyim amshia anendaktsütsü merangra rara tulu adoktsü. Mapa inyakttsü melira kakat tajung alia bendener library lapoker azüngtsü ajungshi nunga koda? Media education peria makaba agi, tanü tamakitsü, olulu (unwanted videos/messages) jenti perokshir aser lendongi air. Akok tashi tsüraburi tanur nem tim shisatsü agütsütsüla.

Tenlaki nungi tenzük sorkar süshia, nija süshia kisü-jensü zünger mezüngma crore jenjang nung yanglur. Item project ajak aener nem dang inyakttsü! Asen jala jabasotem mapa mangur Video Games aser Social Media balala nung mapang entoka kazütepang, aener nem sen talep-talep agütsür aser asen lima nungi sen ajak pei limai senzüka omar! Parnok anogoshi mazungi inyaker meinyakma inyakttsü asen chirtem kazüteper! Hao, ajakibo kisü-jensü mapa meinyakttsü akok, saka parnok inyakttsü mapa jenti lir. Ibai ajanga rongsen asen lima nung dang alitsü aser tershilem-a renloktsü. Saka, tejashitsüka aseni asen sasa asen nisung dak temulung malemer, tzümari inyakttsü ama meinyakttsü ta bilemer!

Kibong Teinyaktsü

Tanü smart phone amshiba ya tanurtem asoshi dang masü taintem asoshia tebilemstsü tuluka kümogo. Tanurtemji khen yutsür asenok taintema mobile phone amshiba agi apauni tsüngda sensaksemstsü mapang mangu kümogo. Pastor-tema aika (with due apology) Laishiba bushiba nung masü mobile phone amshiba nungang mapang talangba entoka alitsü südi. Itemji khen bilemdanga tanurtem dangi maodang asensasa asen azüoktsü junger. - K. Temjen Jamir

Tanur ka kidang anükalema pei tsüraburi ashiba ajak shitak ta amanga aliba senti mapang ya tsüraburtemi melalutsüla. Laishiba ashiba ama pei aotsü leman nungji sayutetra pa/la tain akümdang iba nungi mepilatsü. Digital Age nung asortemi digital gadgets amshitsü shiadoker alir. Anungji tamshi ta ashitsüba kanga shisa maka lir. Saka parnok dang odia tajung-tamajung indang ashitsü tsürabur khuret lir. Tsüraburi kechi ashir ta masü saka kechi inyaker ibaji chimuri angazüka benshir.

Kar-i ashir kokra tanurtem college aser universities zünga aodang ang smartphone amshitsü freedom agütsütsüla; tsüraburi guide süa phone amshidaktsütsüla; tsürabur-shia media values masü, family values generate asütsüla; social media nungi social interaction nung temulung agütsütsüla; mobile phone den kazütsü melen tsürabur, adianu aser pur medemer den kazütsü aser jembitsü angazüdaktsütsüla; aser asenoki tanurtem nem smartphone koma amshidaktsüner yamaji asenokia amshitsüla.

Kibong nung tsüraburi item ya melenshi nungbo Mobile addiction ajemtsü südi:

- Tsüraburi anir video games asaya ki mapa ajak nangtena ayuba.
- Mobile nem babysitter inyakttsüba.
- Unlimited mobile amshitsüba.
- Apuani temeimtep chirnur dang mesayutetba.
- Tetsü oshi mejembitetba ya asen tai ta mebilemba, yamala.

Nija Teinyaktsü

Tanur aser tain tebandang makai Mobile addict akümstsü ana nung lir. Alima nung akaba ajak mobile nung lir; itemji tasü tonga repringaka merepringamtsü! Anungji kechi repringdir- repringaka nükjidong tejangja yur repringtsüla/amshitsüla. "Time-pass" atema mobile-ji amshira ne taküm idakji tempangtsü! Tamalen onük nung shia aliba ama - nai ne sasa mobile addiction jenjang asadangan. Metetsümonga pei sasa pei mazüokra (self-control) kechaia na mazüoktettsü.

Meteta Alitsü Kar

Social Media tapu balala aika ajanga shisatsü aser tangazükba jenti angur. Atangji, channel ajakbo tajangzük angudak masü. Tsüraburi pei chirnur 24/7 monitor süa alitsü makok. Anungji "Google Family Link" app aser yamala app tapu balala amshia tsüraburi pei chirnur kechi app mamshidaktsüner itemji block süa yutettsü akok.

Tsürabur indang mobile phone amshia chirnur games asayaba ajanga tongtipang call aika magizüki süidaktsüba lir. Chirnuri bank account miima amshia sen jenti samaba osang kakat balala ajanga angashir. Tawa Madhya Pradesh nung, class 6 student kati "Free Fire" online games asayadang par tsürabur sen ? 40,000/- miima amshiba guilty feeling ajanga sosetta (suicide) asüba angashiogo. Kidang chirnur mood mejungi dang aliba ya online games tali asayaba ajanga lir. Kechiaser online games teimba raratepba dang lir. Tsüraburi, tesayurtemi, lenirtemi aser Arogo nung tenzükertemi item dynamic-tem ya kanga junga meteta parnok den deal asütsüla.

Otem

Tanü digital age nung smartphone nisung shia akatsü tenüngdaktsü kümogo. Aji oda süaka, ibai tim leman nung mamshira asenok kanga akoksatsü! Lia-liabo smartphone de-addiction center nungdaka akümstsü südi. Smartphone-ji nisungi yangluba oset ka, saka Tsüngremi Pa mesükba nung yangluba nisungji iba oset nem anishidaktsüba tamashi ta asenoki metetdi.

Tsürabur, tesayur, lenirtem yamala ajak smart kümra tanurtemi smartphone den masü asen den kazünüsü. Tanü putu nungbo smartphone mamshiba jagi asenoki tangar memeneptsü kechiaser ibai ajak asoshi tesayur tajung ka lir. Asenok taintem teinyaktsüji, mobile nung tajung-tamajung indang sayutsüla aser mapang amshiyim angazüdaktsütsüla. Laishiba ashiba ama tanur ka pei aotsüba leman nung sayutettsüla aser pa/la tain akümdang iba nungi mepilatsü. Anungji asenoki ibai tenok-tenoka angazüker mapa küma inyakttsü ta ayongzük.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

DABA Youth Ministry indang 'Made in DABA' online service tenzük



Dimapur, September 10 (TYO): Dimapur Ao Baptist Arogo (DABA) Youth Ministry-i achaayangba 6buba "Made in DABA" online service tenzükogo; iba project ya lisopur lanur entrepreneurs aser lisopur products ajungkettsütsü nukjiding nung tenzük.

2016 kum mezüing DABA Youth Ministry-i iba project tenzük Supermarket, Dimapur nung Sales Day ka ayongzüka agia liasü, aser tangbo DABA-i sponsor asüba ministry nung lanur 80 dak temai shilem agir.

Iba ministry online ajanga tenzükba sentong nung

jembidang DABA Youth Director, Jongshimanen-i, iba project tenzükba nukjiding ya lisopur products aser services ajungkettsüba den külemi lanur entrepreneurs ajungmesoa parnok ajungkettsütsü atema lir, ta metetdaksü.

Iba project ajangasa lanurtem peisasa inyaka tangar dak memetaloki alitsü atema ajungshitsü aser lanur entrepreneurs alima den sendakteptsü atema sabang agütsütsü.

Iba dak alia DABA Youth ministry instagram account temeja ka lapokogo aser iba nungji lisopur entrepreneurs-i

yangluba products balala sayatsü.

Dimapur jila nung September 18 nü angati delivery service aginertemi September 10 nungi September 15 tashi nung jelia mangatsü akok, ta paisa metetdaksü.

Tang tashi nungbo iba project nung shilem agitsü atema temsüa alirtemji DABA youth züngsemtem dang lir, saka tarutsü nungbo Naga youth entrepreneurs nem-a shilem agidaksütsü tebilemba lir, ta paisa shisem.

Iba ministry atema DABA-i kum shia sen lakh 1 lemozütsüo.

ANO GO ABEN TSÜNGREM DEN

Ochi jagi na nüji kümdaktsütsü

"Aser nai ochiji metettsü, aser ochi jagi na nüji kümdaktsütsü." Yohan 8:32.

Tsüngremer ochibai kodanga na menokdang; iba yagi na teti nüji kümdaktsür! Na tasü meiti lir asü? Temenen kar madak takok mengui lir asü? Lendong aketba chiyong kar lar küma lir asü? Tsüngrem indang ochibai na nüji kümdaktsütsü ta mangateti alitsü akok.

Ne jakdang tayongzüka den ajuruteptsü na tasü meiti lira, Filipi 4:13 nungi tasü aittsü angazükang: "Khrista shibai ni tasü itdaktsür Pa ajanga ni ajak inyaksü akok." Tensa ajanga nai tamakok ngua lira, Rom 8:28 nung shia aliba nung azüitang. "Tsüngrem meimertem asoshi mapa ajak tajung asoshi inyaker." Na temenen kar lar küma lira 1 Yohan 1:9 ochiji ne taküm agi inyakang, koba nung nai temenen nangzükra, memeshiba ajak nungi na merüktetdaksütsü Tsüngrem tamang katetta lir. Item ajak ne taküm nung Tanela Temeshi-i inyaksü ataa lir.

Ne taküm nung Tsüngrem ochibai mapa inyakba metettsübaji ano mapa ka lir. Tsüngremer ochibaji nai magizükra aser mamangra ochi jagi ne taküm nung mapa meinyaksü. Tangar taküm nung mapa meinyaksü. Tangar taküm nung Tsüngrem aini mapa inyakba nai angashia alitsü akok. Saka item ochibaji ne taküm nung inyaksü nai Tsüngrem dang melaa lir ma? Tanü nü taküm nung ochi inyaksü Pa dang asüngdangang.

Swami Agnivesh-i inyakba mapa tajung bilemteta akhüm agütsür

Dimapur, September 10 (TYO): September 11, 2021 anogo ya Swami Agnivesh sür kum ka ajungba anogomong lir; yaküm pa arrshi kum 81 ajungtsü anogo 10 dang lia September 11 nü temesen tashidak agi asü.

"Swami ya social activist ka aser Hindu reformist lenir ka liasü, ajisiüka pai aiben India nung Khristantem anema inyakba mapatem anema ola adok aser Khristantem pusema aruogo. Pa 1994 nungi 2004 kum tashi United Nations Trust Fund on Contemporary Forms of Slavery nung Chairperson inyaka liasü aser 2004 kum pa nem Right Livelihood Award (alternate Nobel Prize) agüja liasü," ta kaketzülur aser journalist, Anto Akkara-i metetdaksü.



Odisha kübok Kandhamal district nung Khristan aika tepsetba sülen 2018 kum August ita nung kum 10 ajungba anogomong sentong nung Bhubaneswar nung Swami Agnivesh-i jembiba noksa nung angur.

1981 kum Swami-i Bandhua Mukthi Morcha (Bonded Labour Liberation Front) tenteta alar ama züngshiba nisungtem nem nüchiba agütsütsü atema pai inyaka aruogo.

Pai kum 50 shi meshimejungertem atema inyaka aru aser pa asüba sülen nisung aikati pa nem tetushi agütsüo, ta 'Who Killed Swami Laxmananda' kaket zülusang, Anto Akkara-i ashi.

"1999 kum Odisha nung Hindu yimsü alia amangertemi Australia nung Khristan missionary, Graham Staines den pa jabaso ana rongseta südaktsüba sülen Agnivesh leniba nung social activist temi Baripada centre semdanga

liasü. Iba Centre nung missionary Graham-i kum aika zütsüra agi shirangertem tenzük aruogo. Ni-a shilem agitsü liasü saka mapang tatong nung shirangdokba agi medentet, aser iba atemaji tang tashi ni sasar. 2002 kum Gujarat nung rara tulu adokba sülen-a Swami-i ayongzüka telok kati Gujarat semdanga liasü," ta Akkara-isa metetdaksü.

"Swami Agnivesh küna metettepba sülen kum 25 shi külemi inyaksema liasü. Pai ni nungitba ajanga Kandhamal campaign takok tulu ngua liasü. 2009 kum April ita nung ni bushisüngdanga züluba kaket 'Kandhamal - a blot on Indian Secularism' sayaba sentong nunga pa densema lir," ta pai

metetdaksü.

"Agnivesh-i ni ayongzüka Kandhamal program aika nung denogo aser tesüsa 2019 kum January ita nung Kerala nung documentary 'Innocents Imprisoned' sayaba sentong nunga pa dena liasü. Agnivesh-isa Kandhamal nung tai maketba Khristan tenet kibongtem semdangba sülen item kibongtem atema-a pai aria bilemja aruogo," ta paisa metetdaksü.

"Agnivesh-i tasü itta pa tangatetbatem jemi. Hindu yimsü alia amangertemi yimten tashi atema Hindu yimsü amshiba pai aija aru aser 2018 kum nungbo anaben tashi pa anema inyakogo. Kandhamal tatalokba sülen kum 10 ajungbamong nung New Delhi

nung Hindi oshi agi meyipzüka 'Who Killed Swami Laxmananda' kaket pai sayaja liasü. Iba jakdang anogo asem lia BJP office kima nisung kati pa (Swami) dak züka liasü," ta paisa metetdaksü.

"Pai tanga tamangba yimsü ajak akhümtsüba liasü aser takoksa angurtem atema pai nokdak. Hindu nung rongnungi ochi ola adokerji pa liasü. India nung social activist, meshimejungertem aser Khristantemi pa asüba atema sasar," ta pai metetdaksü.

Pa 1939 kum September 21 nü Andhra Pradesh kübok Srikakulam district nung orthodox Brahmin kibong ka nung aso aser pa arrshi kum pongu asüdangyongi tsürabur

anaprong süadokba sülen teboui pa mesüteta liasü.

Pa tenük-telen tera meshidaki liaka pai Law & Commerce azüing aser Kolkata nung aliba St Xavier's College nung lecturer inyak. Loktiliba tenzüktsü atema pa dak tejangraba liasü, anungji pai mapang shia college nung Belgium nung Jesuit ka den sensaksema liasü. Tesülen pai tesayur mapa toktsür law azüing. 1968 kum pa Haryana nung aliba Jhajhar Gurukul-i ao aser 1970 kum March ita nung Arya Samaj züngsem küma 'Swami Agnivesh' ta tenüing melena liasü. Pai Haryana nung yimtenren telok ka tentet aser 1977 kum Haryana nung education minister inyaka liasü.

Police-i longkak aiter aayangertem dak injang khaloktsüba tatalokba nung ajemdaker pai minister menden toktsü aser alar tia nung aliba long-tepertem aser lungro moludak aayangertem atema pai Bonded Labour Liberation Front tenteta liasü. Aayangertem atema nokdakba mapang nung pa anaben tashi apu aser jail nung ita 14 tashi puoka liasü saka tesülen chiok.

Iba mapang nungjagi tenzük Swami-i linük nung dalit nung aser tribal tsürtem atema ola adokba dang masü saka longkak aiterterem dak police-i tashiyim amshiba mesüra linük tesem balala nung tamangba yimsü dak sendakba nung rara adokba nokdangtsü atema inyaka aruogo.



September 10, 2021 nü New Delhi nung Afghan nungertemi Taliban yimsüsüba anema longkak aيتدang Afghan nungger refugee tebur chanu kati Ahmad Massoud indang noksa sayuba noksa nung angur.

Kiralongra atema Afghan li amshitsü memelatsüla: India

New Delhi, Rongjui/September 10 (Agencies): Tang Afghanistan nung yimtenren tensa dak sendakba nung ajemdaker United Nations Security Council senden nung India-i, Taliban teloki parnoki nangzükba ama kiralongra atema Afghan li amshitsü memelatsüla; iba dak alia Security Council resolution 1267 kübok Pakistan nung amenoka aliba Lashkar-e-Taiba aser Jaish-e-Mohammed telok densema kiralongrar telok balala memelatsüla, ta metetdaksü.

UNSC nung Afghanistan onük nung o lemtepa mapang India Permanent Representative to UN Ambassador, T S Tirumurti-i, rara agi raksatsüba linük den India ya kidanger linük ka lir, anungji iba maongka agia India-i Afghanistan dak sendakba bangzüng nung kiralongra densema tebilemtsü onük kar reprangshidaksüner, talisa kiralongratsü atema Afghan nungger li amshitsü atema Taliban-i memelatsüla aser Resolution 1267 kübok züngsema aliba kiralongrarterm aser kiralongra teloktem memelatsüla, ta metetdaksü.

Tirumurti-i, "Security Council bangzüng nung linük kar amokmerentsü mesüra amaksü atema Afghan li memelatsüla mesüra kiralongratem jenokdaksütsü, training agütsütsü, kiralongra atema finance asütsü mesüra kiralongratsü atema asalentong yanglutsü asoshi memelatsüla. Taoba ita Kabul airport nung kiralongrartermi amakba ajanga

Afghanistan atema amokmeren tulu aliba jangjar. Anungji iba dak sendakba nung tezüngzüktep yanglutsüla, aser itemji akhümtsübuttsüla," ta metetdaksü.

Lashkar-e-Taiba aser Jaish-e-Mohammed den külemi Haqqani Network ya UNSC resolution 1267 (1999) kübok kiralongrar teloktem lir. JeM telok tentetsang, Masood Azhar aser LeT lenir, Hafiz Saeed nata 1267 Sanctions regime kübok alima nung kiralongrarterm, ta züngsema lir.

Resolution 2593 nung Taliban teloki, Afghan nungger bendangleni aoba menokdangtsü aser timtem magütsütsü, ta sangdonga aliba agizükogo.

Iba dak sendakba nung Tirumurti-i, "Afghanistan nungger Afghan nungger aser bendangertem tangaleni aoba menokdangtsü aser timtem magütsütsü ta nangzükba densema item tenangzükba ajakji shidak benschitsü, ta onoki imlar," ta metetdaksü.

India-isa alima linüktem dang ajaki longjemer Afghanistan nunggeri yimjung aser security aginüba ataloktsütsü atema inyaksü ayongzük.

"Tang tashi Afghanistan nung tensa majung. Kidanger linük ka ama aser par nüburtem atema medemertem ama onok (India) atema tang tensa ya shisabulutsüsa lir," ta Tirumurti-i ashi.

Afghan nungger atema tarutsü tiaji mejangja, aser tesüiba küm 20 tsüngda yangertetbaji koma asütsüar mejangja, ta pai ashi.

"Iba ama tensa ka nung Afghan tsürtem ola angatsü nüngdak, Afghan nungger tanurtem taginüba ataloktsütsü nüngdak aser minorities temeden kümüzka ayutsü nüngdak, ta onoki nenshia metetdaksür. Onokisa tang rondak süa meimchir temeim sayutsü aser teyari agütsütsü atema UN den tanga agencies nem lenmang sadema lapoktsütsü mepishir," ta pai ashi.

Tesüiba küm aika Afghanistan nung azü kanga tokshigo, ta shia Tirumurti-i, "India-i alima linüktem dang longjemer Afghanistan nunggeri yimjung aser security aginüba ama itemji ataloktsütsü atema inyaksü ayongzük. Asenoki tetsür, tanurtem aser minorities densema Afghan nungger ajak tesünep nung taküm akhüm keta litettsü atema inyaksü nüngdak," ta ashi.

Security Council nung Secretary-General Special Representative for Afghanistan, Deborah Lyons-i, Afghanistan nung Afghan nungger million aika tiaji koma asütsüar ibaji Taliban yimsüsüba dak dang keta lir, ta metetdakja liasü.

Taliban teloki Mullah Mohammad Hasan Akhund leniba kübok Afghanistan nung interim sorkar ka tentettsü, ta sangdongogo.

Kabul nung osangbenertem senden ka nung jembidang Taliban otongdar, Zabihullah Mujahid Islamic sorkar tasenba nung Mullah Acting Prime Minister asütsü aser pa indang Deputy PM ji Mullah Abdul Ghani Baradar asütsü, ta metetdaksüogoo.

BJP-i Goa election nung takok angutsü: Survey

New Delhi, September 10 (Agencies): Taruba Goa assembly election nung ruling BJP-isa takok angutsü aser state nung AAP ya tongti opposition party akümtsüa akok, ta ABP-CVoter-IANS-i agiba survey ka ajanga asadangtetogo.

State pongu nung assembly menden 690 nungi nisung 81,006-i iba survey nung telangzüba agüja shilem agiogo.

2017 küm Goa election nung BJP-i vote shilem 32.5 ngua liasü saka 2022 küm election nungbo shilem 6.9 agi timba küma BJP-i vote shilem 39.4 angutsü, ta survey ajanga asadangtet.

Yamaji 2017 küm Goa election nung AAP indang vote shilem 6.3 dang liasü saka taruba election nungbo vote shilem 15.9 bendenloka parnoki vote shilem 22.2 angutsü. Ano Congress indang vote shilembo shilem 13 agi tajemba küma

taruba election nungbo parnoki vote shilem 15.4 dang angutsü, ta kasa survey ajanga asadangtet.

Vote shilemji menden kümtsüra 2022 küm Goa assembly election nung BJP-i menden 22 nungi 26 tsüngda nung takok angutsü, AAP-i menden 4-8 aser Congress-i menden 3-7 shi angutsü. Goa Assembly nung menden 40 lir.

Survey nung shilem agir shilem 33-i tang teinyakdak chief minister Pramod Sawant maneni chief minister inyakkdaksüner aser shilem 13.8-i AAP nungi chief minister inyakkdaksür saka tang tashi nungbo AAP-i CM candidate shima mali.

Survey nung shilem agir shilem 32.2-i BJP sorkar dak melung kanga asür, shilem 45.9-i melung tera asür aser shilem 21.7-ibo BJP sorkari inyakba nung melung masür.

BJP candidate Priyanka Tibrewal-i Mamata den tokteptsü



September 10, 2021 nü Kolkata nung West Bengal Chief Minister, Mamata Banerjee-i Bhawanipore constituency by election atema nomination file asüi arudang la pusemertemi la agizükba noksa nung angur.

New Delhi, September 10 (Agencies): West Bengal nung Bhabanipur assembly by election nung West Bengal Chief Minister aser Trinamool Congress tongti, Mamata Banerjee den toktepdaksütsü atema Hokolbarnü BJP-i Priyanka Tibrewal shimogo.

Nomination file asüba sülen Tibrewal-i, lai nija ka anema dang tokteper masü saka ochimashi anema tokteper, ta metetdaksü.

Tibrewal ya lawyer ka aser state nung election sülen rara adokba ken o dak sendakba nung Mamata-i aniba sorkar anema ken o benokertem rongnung la densema lir.

"Ni nija ka anema dang tokteper masü saka ochimashi anema tokteper. Iba rara ya West Bengal nüburtem kümüzütsü atema lir. Atangji iba rara ya state nung rara adokba mapang ola madoker (Mamata) ka anema lir," ta Tibrewal-i ashi.

By election atema la yimiyimji kechi?, ta asüngdangba langzüdang lai, "Ni Bhabanipur nung aso saka Mamata bo

Bhabanipur nung asoba masü," ta ashi.

"Lai (Mamata Banerjee) Nandigram menden nungi tamakok ngua liasü aser tang lai chief minister menden nung maneni amentsü atema tokteper. Bhabanipur nüburtemi kü nem vote agütsütsü aser la tamakok ngudaksütsü, ta ni melung alemer," ta laisa shisem.

2014 küm Tibrewal-i BJP nung dena liasü aser tang la BJP youth wing- Bharatiya Janata Yuva Morcha (BJYM) nung state vice president inyaker.

Taküm West Bengal Assembly elections nung lai Entally menden nungi toktepa liasü saka TMC candidate kati la madak vote tali 58,000 agi takok angu.

Election Commission (EC)-i September 30 nü Bhabanipur menden atema election agitsü sangdongogo. Kasa anogo nungjisa state nung Samsanganj aser Jangipur menden na nunga election agitsü aser Odisha nunga Pipli assemby menden atema election agitsü. October 3 nü vote azüngba sülen election osang sangdongtsü.



September 10, 2021 nü Jammu kübok Trikuta Nagar nung Congress MP, Rahul Gandhi-i party nung inyakertem den jembiba noksa nung angur.



India indang Permanent Representative to UN, TS Tirumurti den UNSC züngsem linüktem nungi teshimtet nübutemi New York nung aliba September 11 Memorial nung akum agütsüba mapang tangokba noksa ka yangi angur.

Ita tenet sülen Biden o Xi na phone nung jembia

Washington, Rongjui/Sept. 10 (Agencies): United States Tir Joe Biden aser China lenir Xi Jinping na phone ajanga jembia alima nung economies tulutiba ana indang lenir tsüngta ita tenet jungnüa indang-indanga osang ola magitepba tatem kati aruogo.

Tena jembiba ya White House aser China indang state media ajanga jangjatsü, aser tena ya Hukulbarnep jembia, ta ashi.

Minute 90 shi sensaksema mapang US-China tesendaktep atema lenmang ngutetsü nung rangloka liasü, ta White House ajanga ashi.

Xi den jembitsü asoshi Biden-i mera agi, koba Biden-i January ita tir office agizükba sülen lenir ana tsüngta jembiba tanaben alitsü. Coronavirus tashidak wara poktetba, human

rights aser shishilempaba tsütsü linük ana tangatetba balala nung ajemdaker lia lenir ana tsüngta sensaksem ka agi, saka tzü-mopung melenba densema linük anati kasa süoki ia bilemba indang onüktem jembia liasü.

Tena temolung taroktiba nungi jembia aser Tir Xi-i China madak US sentong mechi par tesendaktep nung timtem agütsür ta ashi, ta China state media ajanga ashi.

Anatsülen nungi mapang shia jembitsü molungtepa liasü, ta China tsütsü sangdong ajanga ashi.

Tena phone ajanga mejembidang senior administration ketdangsür kati ashiba agi, Beijing den kera tongtepratepba atema White House temolung masür.

Iba ketdangsür ya yimjak

nung jembitsü temelaba agüja mali aser pai pa tenüng temai madokdaksüi ashiba agi, Biden nungi indang-indanga Xi-i angashiba ya tajangzük asütsü ama White House ketdangsür teimla lir.

Taoba hopta, US-China tesendaktep tamajungba akumba ajanga tzü-mopung melenba tsütsü tesendaktep mejungi akumtsü, ta Foreign Minister Wang Yi-i Biden climate envoy John Kerry dang shia liasü.

Kerry ya Wang den video link ajanga tzü-mopung atema jembishinütsü asoshi Tianjin semdangba mapang iba ama amalitep ya tesendaktep tuluba atema mepilatsüla aser tesendaktep tajungba akumtsü atema US-i mera agütsüla, ta Wang-i shia liasü.

Lebanon tiri sorkar tasen tentetba sangdongogo

Beirut, Rongjui/Sept. 10 (Agencies): Ato Kilonser Najib Mikati aser Tir Michel Aoun nati Parliament Speaker Nabih Berri lia totuyuba ka nung meyonngem agüja sorkar tasen ka tentetogo, ta Lebanese presidency ajanga sangdong ka nung ashi.

Lebanon nung küm ka dak tema sorkar kata meliasü aser rongsenketzüng tia tamajungbai alu.

"Tensa kanga majung lir. Saka Lebanon nung ama asenok lungjemra tamakoktsü mali. Asenoki asen teka amteptsüla. Asenok ajak külemi lungjemer teimla aser temolungtetba nung mapai aor," ta Mikati-i Hukulbarnep osangbener dang ashi.

Sorkar tentettsü asoshi Aoun den senden amenba sülen tir aliba Baabda Palace nungi ato kilonser tasenbai osangbener senden ka nung iba osang ya sangdonga liasü.

Tir majurudang Berri ya tir aliba kidangi kaket ka osangbener dang sayua aru, kong minister tem tenüng zülua liasü.

Taoba sorkar nung ama tang sorkar tasenba nunga nübu tasentem dena lir, aser item rongnung Central Bank nungi ketdangsür tejen Yousef Khalil ya Finance Minister shim, sorkar meyonng Rafic Hariri University Hospital nungi Firas Abiad ya Health Minister alitsü, shiba COVID-19 tashidak wara poktetba mapang nüburtemi meteta akum.

Mikati-i Lebanon ya tensa balaka ajanga anitsü nangzük

lir, kong rongsenketzüng jenjang maneni tamajungba akumer, aser pai shisaliok aser mozü agi anünga akumba indang süoki ia bilemba lemsatetba liasü.

Küm ana majungdang Lebanese pound jenjang ya shilem 90 sama aser linük nung petrol, diesel aser mozü agi anünga nüburtem maneni tim atemer. Lebanon nütsünyongsük shilem pezü sadanger shilem asem jungnüa makamait tia nung lir, ta tawa United Nations ajanga asadangteta liasü.

Linük balalai Lebanon dang amajok aser tashi mait economic sector tem yanglushitsü, International Monetary Fund den jembishinü tenzükshitsü aser May 2022 nung aitsü renema aliba general election agütsü ajunghir.

Sorkar tenteter asünungji, Mikati sorkar atema vote of confidence agütsütsü atema yakta Parliament jateptsü.

Taoba ato kilonser Saad Hariri anenli July 26 nü Mikati ya shimteta liasü.

Iba sülen Mikati, Tir Aoun aser danga yimten yimsüsür lanirtem minister shimtsü atema jembishinüa aru.

Mikati aser Aoun na tawa mangatetep kar ajuru saka United States aser France-i ajungshiba ajanga atsüanem aka, ta osang ka ajanga ashi.

Beirut rongnendak lendong tulu atalokba sülen 2020 küm August ita caretaker Prime Minister Hasan Diab'er sorkar anenba sülen Lebanon nung küm 13 sorkar temeja ka meliasü.

Duterte'er jalai Philippines tir asoshi metokteptsü ashir

Manila, Rongjui/Sept. 10 (Agencies): Philippines Tir Rodrigo Duterte'er jalai 2022 küm May ita tir election nung metokteptsü, ta sangdongogo saka ita ishika tsüngta la linük nung political blocs tulutem den senden mena aruba ajanga aikati mamanger.

Sara Duterte-Carpio, shiba tang Davao indang mayor inyaker, lai Brehostibarnü ashiba agi, tebu vice president atema tokteptsü lemteta lir asünung lai tir atema metokteptsü.

"Ni linük nung jenjang ka atema metokteptsü kechiaser 2022 nung linük jenjang ka atema ka kisüng tokteptsü ta küna jembitepa lir," ta Duterte-Carpio-i sensaksem ka aser sangdong ka nung ashi.

Party puri vice president atema Rodrigo Duterte shimtetba Bodhbarnü agizükogo. Pa ya tir ka ama kümsük tanabuba inyaksü constitution-i memelar, anungji pa ya linük nung tematiba menden jenjang tanabuba nung mener yimsü süner, ta

teshisadanger temi ashir. Taoba mapang pa busemer temi Duterte-Carpio ya tir atema aser tebu ya tatong tir atema toktepsü nung ajungtsü, ta jembia liasü.

Rodrigo Duterte ya taoba mapang Davao indang mayor inyaka liasü, aser kümsük tatakzük mechi pa iba menden asoshi tokteptsü memelaba sülen pa vice mayor ka ama inyak aser Duterte-Carpio ya mayor ka ama inyaka liasü.

Tawa survey kar agiba nung 2022 tir election asoshi Duterte-Carpio jenjang tajungba, ta ajiteta liasü.

Sara Duterte-Carpio indang noksa aliba banner tem aser la dang tir atema toktepsü ta ajungshiba yimyim linük tesem ajungalen prokshia liasü. Aser nüburtemi bilemba nemjemtsü asoshi lai mera kangabo magi aser tongtipang political blocs aser yimten yimsüsür tejentem den senden mena liasü, aser kar dang la indang vice president inyaksü asüngdanga liasü.

Social media nunga

Facebook group aser page tem nung la sülen anidaker nisung meyrirjang aikati "Run, Sara, Run" ta yimyim prokshia liasü.

Tir menden asoshi tokteptsü atema yimten yimsüsürtemi October 8 tashi tenüng agütsütsü akok. Ajisüaka parnoki November 15 tashinung tenüng agientsü mesüra temelen tetokteper kar ngutetra itemji melentsü akok. 2015 küm candidate kati tir menden asoshi toktepsü nungi atsüingiba sülen Duterte-i pa tenüng agüja liasü.

Brehostibarnü Duterte-Carpio dang Philippine Daily Inquirer osangkaket ajanga, la tebu vice president atema tokteptsü aliba temolung melenshira lai tir atema tokteptsü akok asü, ta asüngdanga mapang, "Iba tasüngdanga nung tensa junga meshisadangi nisungtemi bilemba dena lir, anungji tangbo ni melanzütettsü," ta lai ashi.

Bodhbarnü PDP-Laban Party ajanga Tir Duterte ya vice presidential candidate ka ama shimtet aser pai tamang katetba

pa den yariteper Senator Bong Go ya tir atema shimteta liasü.

Saka Go-i iba nomination ya magizük. Taoba mapang, tir atema tokteptsü asoshi Duterte'er kibong nem telemtetba agidaksütsü, ta shia liasü.

Duterte'er political party tsüngta telemsa ka adoka lir. International boxing champion, Senator Mannu Pacquiao-i aniba telokia national candidate ka shimtsü, ta shia lir.

Pacquiao, shiba tir atema tokteptsü asoshi shisadanga mapang ka lir, pai telemtetba ya September 19 tashinung agütsü akok, ta par telok nungi odongtar Ronwald Munsayac-i ashi. Pacquiao ya linük south tsütsü Mindanao nungi lir, kong Duterte busemer timba lir.

Duterte aser Go nati sangdongba ya Davao nung ano candidate ka lir ta temaitsü sayur alitsü, ta Munsayac-i Brehostibarnü ashi saka Duterte-Carpio tenüngbo mamshi.

Candidate tenüng agütsütsü asoshi anogo mesüitem tashi Duterte-Carpio-i sangdongba

nung Philippines nüburi mamangtsüla, ta political analyst Ramon Casiple-i ABS-CBN News dang ashi.

Duterte-i küm ka tejakdang par jala ya pa melen tir inyadaksüner ta shia lir, ta Casiple-i ashi.

"Tanü nenoki anguba ajunga ya tasa ka dang lir," ta pai ashi.

Duterte-i taruba küm tir menden yutsüba sülen pai temesepba mozü anema raraba nung International Criminal Court ajanga ken o benoktsü akok, anungji pa kumzük ayutsü asoshi temelener ka aginer, ta yimtenren asadanger temi ashir.

Par kibong sentong indang asüngdanga mapang, Duterte-Carpio'er regional party Hugpong ng Pagbabago (Alliance for Change) nung secretary general, Anthony del Rosario-i, Tir Duterte-i tanaben bilemdangtsü akok aser par jala mesüzüktsü, ta Hukulbarnep ashi.

"October tashinung mayor-i temolung melenshitsü teimla lir," ta pai ashi.

Morong Express-i 'Sing For Peace' ayongzüksü

Dimapur, Rongjui/September 10, 2021 (TYO): Aruya aliba 'International Day of Peace 2021' (September 21) anogomung nungtem nung, Morong Express-i "The Road to a Lasting Peace" omen nung ajemdaker YouTube ajanga ken tetoktepba sentong ayongzüksü terenemba lir, ta sangdong ajanga metetdaksü.

Music ajanga International Day of Peace benjongmung agitsü asoshi Sing For Peace ayongzük. Linük balala aser meimchir tsungda yimji-yimjung akangshidaksüsü aser iba anogo biletetsüsü asoshi UN General Assembly ajanga 1981 kum International Day of Peace tenzuka liasü.

Iba tetoktepba angati asütsü aser iba sentong nung arishi kum tebandang kecha makai tulu tila ajaki shilem agitsü asoshi maongka lapoktsür. Shilem

agirtemi Naga nung oshi mashi ka nung ken mejema atentsüla (original composition). Ken mejema/ken atenba/video yanglutsü asoshi shilem agirtem atakzükja/tatazük mali. Iba Ken indang English oshi agi meyipzükba kenjang agütsüsü. Iba den külemi ken ajak 'video format' nung edit ser yoktsüla.

Shilem agitsüpur temi pei indang ken video morung@gmail.com nung email yoktsü mesüra WhatsApp document ajanga ph.no. +91 87878 46184 dangi yoktsü akok.

Iba tetoktepba atema telemsa aser sempet tem:

- Winner: Rs 25,000/-
- Best Lyrics: Rs 7,000/-
- Highest views on YouTube: Rs 5,000/-
- Youngest Participant: Rs 1,500/-
- Oldest Participant: Rs 1,500/-

Sing For Peace nung shilem agitsüpurtemi Honibar (18.09.2021) aonung 6:00 ako tashi pei pei mejema ken yoktsüla. Iba tetoktepba indang result Mongolbar (21.09.2021) aonung 6:00 ako nung metetdaksüsü.

Maneni, takok angurtemi pei indang ID bener October 5, 2021 (Mongolbar) matongdang sempet agizüksüla. SING FOR PEACE sentong atema tetendangerji Tali Angh asütsü. Tali Angh ya Contemporary Christian Music artist, performer, singer-songwriter aser worship leader ka lir.

Iba sentong dak sendakba nung asündangyatsü mesüra osang agitsü kar danga lira, Veroli Zhimo aser Akangjungla den ph no. +91 87878 46184 nung tongtepratepang, ta kasa sangdong nung shia lir.

Mon nung cooking competition ayongzük

Mon, Rongjui/September 10, 2021 (TYO): POSHAN Maah 2021 sentong shilem ama, Hokolbarnü, Mon Block (ICDS) aser District den RD-NRLM longjemer Chi yimtsü nung Cooking competition cum Local food show sentong ayongzük, ta sangdong ajanga metetdaksü.

Iba sentong nung Block Coordinator Poshan, Yingphe menden liasü aser sentong nung Lithrila SDO (C), Hq, Tingyeh Konyak BDO, Mon Block, DPO (ICDS), CDPO Mon Block, Supervisors, Poshan Coordinators, Council Chairman Chi village, Anganwadi Workers, Anganwadi Helpers, SHG züngsemtem aser RD-NRLM nungi staff tem denogo.

Teloktep department ajak tenung nung, Y. Tauhong Ngonyen DPO (ICDS)-i telok pelaa agizük. Pai, temang nung teyari agütsüba chiyongtsütem aser tetsürtemi chiyongtsü tajung chia-ajemtsü indang tongtibatngtem telok dang metetdaksü.

Tetsürtem atema Antenatal check up nung temolung

agütsüsü kanga tongtibang aser ajaki tangatetba tajung nung shilem agitsüla, ta pai ashi.

Ngonyen-isa PMMVY scheme indang tongtibatngtem tongmelang agi telok dang rasa ashi.

Iba sentong nung jangrabangra shilem agiba asoshi Lithrila Sangtam SDO (C) Hq-i shilem agir dang pelaba lemsatep. Lai, shilem agirtem dang alu nung tsünüsembongba süngolemba aser pei sasa yanglutetba chiyongtsü tem junga anepalutsü aser tarutsü nunga yamai telongjem nung amalitepa inyaka aotsü asoshi ajungshia liasü.

BDO Mon Block, Tingyeh-i, iba sentong nung shilem agirtem dang zübazülema malitsü, saka mozü mamshii aonsotsü/süngolemba tapu balala akok tashi tsünütsü asoshi temolung agütsüsüla, ta telok ayongzük.

Temang anepaluba tsütsü tekümdangtsü osang sangokja aser iba sentong takok ngua ayongzükba asoshi, Chi village Chairman-i yim tenung nung

sentong ayongtertem dang pelaba metetdaksü.

Secretary Shakjong VLO, Chi, Yapoa-i tetsür aser tanur tem anema alitsü aser achi-ajemba yimyatem tajungba agi melenshitsü indang tongtibatngtem nung jembia liasü aser lokti nung temelenshi adokdaksüsü atema achi-ajemtsü peria manguba tanurtem asaohi inyaksüla ta ashi.

Maneni, iba sentong nung, cooking competition atema SHGs 8 aser Local food show atema SHGs trok agi shilem agiogo. CDPO (ICDS) Mon Block, Renchano-i, kidang s o r c h i o k b a / r e n e m b a chiyongtsütem kima yimdong nung anguba chiyongtsü balala agi memelentsüla, kechiyong kidang anepalua yangluba chiyongtsü achi-ajemba ajanga lenmang aisü nung temang asoshi nungdakba teyari balala agütsür, ta telok dang metetdakja liasü.

Iba tetoktepba aser show sentong nung, Mongjum SHG teloki mezüngbuba jenjang angu. Kasa tetoktepba nung, Teimongpu SHG aser Shamei SHG nati tanabuba aser tasembuba jenjang nguogo. Iba sentong takok ngua agitetsüsa longjemer inyakba aser mapang agutsütetba asoshi lai teloktep Department ajak, Chi yimtsü nung tantsü-tambu aser sentong nung shilem agir ajak dang pelaba metetdaksü, ta kasa sangdong nung shia lir.

Mt. Tiya College nung webinar ka ayongzük

Wokha, Rongjui/September 10, 2021 (TYO): IQAC, MTC Wokha den longjemer Research & Seminar Committee ajanga Brehostibarnü (09.09.2021) "Research Methodology & Academic Writing Skills" nung National Webinar ka agia liasü, ta sangdong ajanga metetdaksü.

MTC nung iba Webinar mezüng ayongzük asütsü, kong India nung University aser College balala nungi nisung 90 agi shilem agiogo.

Iba sentong nung Dr. W. Meribeni Patton, Chairperson & Convenor, Research & Seminar Committee ajanga telok pela agizük. Iba Webinar nung shisalen sayurji Prof. Vivek Kumar, Chairperson, Centre for the study of social system (CSSS), school of social sciences (SSS), Jawaharlal Nehru University aser Prof.

Zarenthung Ezung, Head of Dept. Department of Economics, Nagaland University na liasü aser shisalen sayur anapronglai Research züluba aser iba maparen yimyatem nung jembio.

Tesayur aser scholar tem dang research maparen tajungba inyaksü asoshi nungdakba tesayubatem agütsüsü mesüra research züluba tsütsü parnok tali renlok daksüsü nükjindong yur iba Webinar nung shisalen sayuri jembia liasü.

Medongunuo Ngone, Co-ordinator IQAC, MTC-i iba Webinar sentong ketdangsu agiogo. Dr. Roland K Kikon Member Research & Seminar Committee, MTC-i Moderator ama shilem agi aser Dr. Rosanna Kikon, Member Research & Seminar Committee, MTC-i tepela anküp o jembia, ta kasa sangdong ajanga metetdaksü.

SÜR KÜM KA AJUNGBA ANOGO BILEMTETER



Asür Mr. I. Asang Walling (11.09.20)

"Pa tesünepdaki air; parnok lep nung parnok anisüngzük, pa temeshi aser tindangba lenmangi aor." Isaia 57:2

Tanü anogo na iba alima nungi pilar kum ka abensar, saka onoki na anogo ka danga mebileteteti mesuidaksür.

Nü tamang sarasadem tanang nüksü onoki teti bileteter.

Nü tzüngnep nung jajatsü teti meranger, iba ya onok asoshi temoatsü tulutiba. Tsüngrem tajungsang den teti anisüngzükka liangma.

Temiem Kinungtsü, Jabasotem aser Kinungertem.

MULUNGNEN LEMSATEPER

Asür C. Imnalepba Jamir, Ungma

Aso : 07/04/1950 - Asü : 08/09/2021

Onoki teti meima aliba asür C. Imnalepba Jamir, pa shirang yipden nung alidang nungi tasünü tashi shirnokisa sarasadem, rongsen aser nubu agi bendanga yariogo, nenok ajak dang kangasa pelaba lemsateper.

Ozü-i nenok nem kecha meyipa agütsüsü maka, saka asen Teyanglur Tsüngremi nenok kija aser kibong madak temoatsü suang ta ozü sarasadem.

Temiem Kinungtsü, Chirnurtem aser Kinungertem.



OFFICE OF THE AKHOYATSÜR TELONGJEM DIMAPUR
Dimapur - 797112, Nagaland.

KONANG TETUSHI AGÜTSÜR

Akhoyatsür rongnung lenir Wt. K. Tainla Imsong, asür Wb. Koraongba aser Wt. Chubamongla na jala, lai taküm 2021 kum Dimapur nungi District Teacher's Award tajung nguteta, Akhoyatsür ajak nümadangtetsüsa tenung tajung bener arutsüba atema la nem tetushi tulu agütsür aser ano maneni Tsüngremi nübortem asoshi la taküm aser watang ajak nung azükaru moajangma ta sarasademtsür.

Sd/-

Wt. Aienla Jamir, President, ATD.

Tseminyu nung SDPDB senden agiogo

Tseminyu, Rongjui/September 10, 2021 (TYO):

ADC conference hall aser Kandinu Government High School ya Government SDPDB & Advisor Animal Husbandry & Women Development, Chairmam R. Khing den SDPDB Tseminyu division senden ka agia liasü.

Iba senden agiba mapang,

teloki taoba senden nung lemetetba onüktem benoka jembia aser Kandinu Government Higher Secondary School agi melentsü aser Tseminyu nung Model College atema ali/kimung melatsü asoshi onük benok jembio. Iba senden nung Manpai, Phom ADC Tseminyu menden liasü.



RASHTRIYA AYURVEDA VIDYAPEETH
(NATIONAL ACADEMY OF AYURVEDA)

(An autonomous organization under Ministry of AYUSH, Govt. of India)
Dhanwantari Bhawan, Road No.66, Punjabi Bagh (West), New Delhi-110026
Phone Nos.: 011- 25228548 & 25229753 Email: gsp-ravdl@gov.in

ADMISSION NOTICE 2021-22

IMCC Act-1970 kübok University/College mashi nungi BAMS (Ayurvedacharya)/M.D. (Ay.)/M.S. (Ay.) nung temsüa alir Ayurvedic doctor tem atema kum ka "Certificate Course of Rashtriya Ayurveda Vidyapeeth (CRA V)" nung admission atema Rashtriya Ayurveda Vidyapeeth, New Delhi (RAV)-i October 03, 2021 (Deobar) nü New Delhi, Pune, Jaipur, Bengaluru, Varanasi aser Thrissur nung Written Test agitsü. Jangra alir candidate temi eligibility, subjects, application indang format, prospectus aser tanga osang metetsü asoshi Vidyapeeth indang website www.ravdelhi.njc.in nung tongteprateptsü akok aser September 26, 2021 matongdang candidate temi pei indang application tekalen agüja aliba website nung e-mail ajanga yoktsüla.

davp 17212/11/0002/2122

Director, Rashtriya Ayurveda Vidyapeeth

Jakhama nung SASU Open Futsal asayamung tenzükogo



Kohima, Rongjui/September 10, 2021: Jakhama local ground nung SASU Open Futsal asayamung metenzükdang tongti tesemdanger Meyiesul Chaya den SASU executives, asayartem aser tangartem külemi tangokba noksa ka yangi angur.

Kohima, Rongjui/September 10, 2021 (TYO): Hokolbarnü, Jakhama Local Ground nung Southern Angami Students' Union (SASU) ajanga 'Rise As One' omen nung ajemdaker ayongba Open Futsal Tournament 2021 tenzükogo, ta sangdong ajanga metetdaksü.

Iba asayamung lapokba sentong nung Er. Zale Neikha, Advisor Youth Resources and Sports indang PS, Meyiesul Chaya tongti tesemdanger ama aruagi denogo.

Open Futsal Tournament ayongzüksü atongtetba asoshi SASU dang pelaba mapang, Chaya-i, football sapurtem dang iba saispang tejangraba mesamadaksütsü aser iba asaya ajanga tali dang longjemtsü asoshi ayongzükä liasü.

Chaya-i, tebilemba kecha makai ayong ayonga melii, saksalema aser ochishia

inyaktsü, tajung tsütsü kati kati ajungshiteptsü aser lokti nung temelenshi adokdaksütsü asoshi nukla yur inyaktsüla, ta telok ajungmeso.

SASU president, Zhovito Rikha-i, lokti nung telongjem akangshidaksütsü aser nübur tsüngda saispang meimba tanela mesamadaksütsü nükjindong yur iba asayamung ayongzükä, ta ashi.

Iba sentong nung Viravoto Seleyi-i ken ka aten aser Tsüngremer leniba aser temoatsü meshizüka Catholic Church Jakhama Town indang Catechist, Koleto Kirha-i sarasadem.

Anogo ana (Hokolbar aser Honibar) tashi ayongba asayamung nung, Southern Angami tesem aser Kohima nungi team 48 agi shilem agidar.

Iba asayamung nung takok angur team nem senpet 30,000, runner up nem senpet 15,000 aser semi-finalist ana nem

senpet 3000 agütsütsü. Ano, individual award nung, top scorer aser best goal keeper shia nem senpet 1500 aser 'player of the tournament' nem senpet 2000 agütsütsü.

Chaya-i iba asayamung tenzükä liasü aser asayamung nung shilem agir team tem telok dang metetpeladaksü.

Mezüng match nung, Jakhama Town Youth Society-i Khami United madak 5-1 agi takok angu. Jakhama Town Youth Society nungi Kikovito Rolnu-i iba asayamung nung mezüng goal idakja liasü.

Maneni, Honibar nikongdang 3:30 ako nungi asayamung final tenzüksü. Iba asayamung shibangba sentong nung Medo Yhokha Advisor Technical Education & Elections indang PS, Metekhriezo Patrick Khale tongti tesemdanger ama aruagi adentsü, ta kasa sangdong nung shia lir.

US Open: Emma o Leylah na final asayatsü

New York, Rongjui/September 10, 2021 (Agencies): Tang asaya aliba US Open nung, British tsür Emma Raducanu-i tetsür kija semi final takok anguba sülen, iba asayamung final tongogo. Arishi küm 18 tain Emma-i 6-1, 6-4 agi World no.17 Maria Sakkari tsükdaksü. Iba asayamung nung Emma-i set ka nung danga tamakok mengui final tongteter asütsü.

Qualifying ajanga tetsür kija Grand Slam final tongteter rongnung Emma Raducanu mezüng kümogo.

Honibarnü (11.09.2021), Emma-i Canada tsür Leylah Fernandez den final asayatsü, shiba Hombarnü (06.09.2021) arishi küm 19 jungogo.

Emma aser Sakkari na asayaba mapang, 'British tennis royalty' Tim Henman aser Virginia Wade naprongla repranga liasü. Iba asaya nung Emma-i la indang mezüng service game nungi break point 7 angu aser mezüng set nung 5-0 agi tejakdang ser asayatsü asoshi Sakkari-i asemben tashi double fault' menaba ajanga Emma-i maongka angu.

Emma Raducanu-i US Open final kokra, 2004 küm Maria Sharapova arishi küm 17 alidang lai Wimbledon takok ngur külen nungi, Grand Slam takok angur rongnung Emma tanotsüla akümtsü.

Kasa asayamung asaya tanga ka nung, Canada tsür Leylah Fernandez arishi küm 19 ajungba sülen anogo ishika lir, lai mezüng Grand Slam semi-final takok nguogo.

Iba asaya nung Leylah-i

World no. 2 Aryna Sabalenka tsükdaksü. Arthur Ashe Stadium nung iba asaya tenzükli Leylah-i bilemba ama masayatet, saka Canada tsür qualifier Leylah-i tezü metangi meranga toktep aser lai Aryna madak 7-6 (3), 4-6, 6-4 agi takok angu.

Semifinal asaya takok anguba den külemi, world no. 73 Leylah Fernandez-i ranking temaba jenjang nung alir asayar ka set asem nung pezüben tashi atonga takok angur asütsü. Mezüng, Leylah-i world no. 3 aser 2018 den 2020 US Open champion Naomi Osaka tsükdaksü. Tanabuba nung, 2016 asayamung takok angula World No. 16 Angelique Kerber madak takok angu. Iba sülen, laisa (Leylah) World No. 5 Elina Svitolina aser Sabalenka naprongla tsükdaksü.

"Küm sa küm meranga inyaka arur sülen tanü ni iba jenjang tongteter," ta Fernandez-i ashi.

Leylah-i iba asayamung final kokra, Canada tsür tennis asayar rongnung lai US Open tanabuba takok angur asütsü. 2019 küm külem Canada tsür Bianca Andreescu-i US Open tetsür kija final koka lir.

Leylah Fernandez Montreal nung aso aser la tebu ya Ecuador nung, shiba la indang coach ka lir. New York nung la tebu arua maliyonga, phone ajanga tennis tsütsü tesayuba agütsüdar. Leylah tetsü ya Filipino Canadian tsür ka aser lar kibong Florida nung alir.

Honibarnü tetsür kija final nung Leylah Fernandez-i Emma Raducanu den asayatsü.

T20 WC: Afghanistan team atema Mohammad Nabi captain shimogo

New Delhi, Rongjui/September 10, 2021 (Agencies): Aruya aliba T20 World Cup atema, Brehostibarnü, Rashid Khan-i Afghanistan cricket squad indang captain mapa toktsüba sülen, all-rounder Mohammad Nabi lenisüba kübok team-i iba asayamung nung shilem agitsü terenemba lir.

UAE aser Oman nung asayatsü renemba ICC men's T20 World Cup atema squad sangdongtsü aliba jakdang, spin bowler Rashid-i pa dang temelaba magii inyaka liasü ta metetdaksüba sülen, pai captain mapa toktsütsü lemtet.

Nabi, shibai taoba mapang Afghanistan tebur cricket team atema captain inyaka liasü, pai tanaben iba team anir T20 World Cup nung shilem agitsü, ta ESPNricinfo sangdong ajanga metetdaksü.

Brehostibarnü, T20 World Cup atema Afghanistan Cricket Board (ACB)-i squad sangdongogo. Squad sangdonger sülen minute ishika lir, Rashid-i, team atema selection committee aser ACB nati kü tebilemba mangadangi dang inyak, ta ashi.

"Captain ka ama aser linük

asoshi ni khuret abener, team selection nung shilem agitsü asoshi kü nem temeden agüja lir. Team atema selection committee aser ACB nati kü tebilemba mangadangi inyak, koba ACB ajanga squad sangdong," ta Twitter ajanga Rashid-i lemsatet.

"Afghanistan T20 team nungi captain mapa toktsütsü ni telemtetba agir. Afghanistan nem tenüng tajung bener arutsü asoshi ni maneni asayatsü," ta pai shisem.

Afghanistan T20 squad nung, wicket-keeper batsman Mohammad Shahzad-a anioka liasü. Kasa squad nung Afasr Zazai aser Farid Ahmad Malik naprongla reserve player' ama aniokogo.

T20 World Cup atema Afghanistan T20 Squad nung asayartemji Rashid Khan, Rahmanullah Gurbaz, Hazratullah Zazai, Usman Ghani, Asghar Afghan, Mohammad Nabi, Najibullah Zadran, Hashmatullah Shahidi, Mohammad Shahzad, Mujeeb ur Rahman, Karim Janat, Gulbadin Naib, Naveen ul Haq, Hamid Hassan, Sharafuddin Ashraf, Dawlat Zadran, Shapoor Zadran aser Qais Ahmed nung asütsü.

World Cup qualifier: Brazil-i goal 2-0 agi Peru kokogo

Recife, Rongjui/September 10, 2021 (Agencies): Arena Pernambuco kübok World Cup qualifying asayamung nung, Brazil aser Peru na asaya liasü. Iba asaya nung Brazil-i goal 2-0 agi Peru tsükdaksü.

Neymar teyari ajanga Everton Ribeiro-i minute 14buba nung mezüng goal idaktsü aser mezüng half atemtsü minute pungo lia, Neymar-i minute 40buba nung Brazil atema goal tanabuba inoktsü.

Brazil team puri iba asaya takok anguba den külemi, Neymar-ia otsüsütsüsa alizüng tasen ka tongtet. World Cup qualifier asayamung nung, Brazil nung football asayar rongnung Neymar-i goal 12 tashi idaktsür asütsü aser pai külem Brazil nung Romário, shibai taoba mapang Brazil team atema asayaogo, pa indang WCQ goal record ajangetogogo.

Tang asaya aliba World Cup qualifying nung, Brazil nung asayar tajung 10 tashi maden yongjia, Peru den asayatsü

asoshi team tajung ka tentetogo. Iba International asayamung atema, pei pei club (Brazil asayartem dena aliba club) ajanga South America-i maotsü asoshi teyuogo. Seleccion team nung Alisson, Fabinho, Roberto Firmino (Liverpool); Ederson, Gabriel Jesus (Manchester City); Thiago Silva (Chelsea); Fred (Manchester United); Richarlison (Everton), Raphinha (Leeds), Claudinho aser Malcom (Zenit) nung dena mali.

Item asayar melen, Brazil coach Tite-i defender Lucas Verissimo, midfielders Bruno Guimaraes, Gerson aser Everton Ribeiro; aser striker Gabriel Barbosa, Hulk aser Matheus Cunha nung anioka Peru den asayaogo.

Brazil puri par linük nung qualifier tukububa asaya liasü aser Qatar 2022 qualifier nungi asaya 8buba takok angur

asütsü. Item asaya nungi Brazil-i point 24 ngua South American qualifying group nung parnoki temaba jenjang tongtetogogo. Iba group nung Brazil-i point 6 agi Argentina team ajangetogogo. Brehostibarnü, qualifying asaya tanga ka nung Argentina-i goal 3-0 agi Bolivia tsükdaksü.

"Asaya asem tashi nung tongti asayar aika medeni asayaogo, koba ajanga tanga asayartem asayatsü asoshi maongka angu aser parnoki team atema bendanga agüja asayaogo. Team tajung ka ama onoki shilem agir ama ni bilemer," ta captain Casemiro-i ashi.

"Onoki asaya 8 tashi atonga takok nguogo, koba otsü asütsü aser onok rongnung asayar shiba shimtsü mejangja, saka World Cup nung onok asayatsü asoshi bilemdar," ta pai ashi.

BILEMDANGANG

"Alima nung ajak asoshi mapalem balala kar."